

乾隆杭州府志

杭州府志首卷六

巡幸

康熙二十八年二月

聖祖仁皇帝南巡幸浙

駐蹕杭州府湧金門內太平坊

行宮

是月欽奉

上諭朕因省察黎庶疾苦兼閩河工巡幸江南便道至浙觀問風俗簡約儀衛鹵簿不設扈從者僅三百餘人頃經維揚民間結綵歡迎盈衢溢巷雖出恭敬愛戴之誠恐致稍損物力甚爲惜

之朕視寓內編氓皆吾赤子惟使比戶豐饒卽不張結綵幔朕
心亦所嘉悅前途經歷諸郡邑宜體朕意悉爲停止又見百姓
老幼男婦奔走雜遝瞻望恐後未免喧譁擁塞念此行原以爲
民不嚴警蹕但人衆無所區別高崖水次或有傾跌之虞一夫
不獲其所足軫朕懷此後止于夾道跪迎勿得紊亂追趨致有
諸患著卽詳加曉諭使知朕愛民切實咸爲遵行特諭

是月十一日欽奉

上諭朕稽古省方咨求治理閱視河道期底平成凡有利于民生
必令霑夫實惠茲行次浙江省禹陵在望念大禹功德隆盛萬世
永賴應行親詣以展企慕之忱其致祭典禮所司卽察例舉行

政治所先在崇文教江南浙江爲人文萃集之地入學額數應酌量加增永昭弘獎著該督撫詳議奏請江寧鎮江杭州駐防滿洲漢軍兵丁鎮守要地久歷歲時深用軫念應作何恩賚以彰優恤著該部議奏自南巡以來所經過地方官員除八法處分及列款糾劾外凡因公誣降級留任者俱准與開復降級調用者著帶所降之級留任其經過地方見在監禁人犯除十惡及詔欵所不赦等罪並官員犯贓不宥外其餘自康熙二十八年二月十一日以前死罪及軍流徒罪以下已結未結俱著寬釋以示朕赦罪宥過之意備辦船隻地方各官効力勤勞者著該督撫會同奉差官員確查具題各加一級縟夫供役勞苦

亦著該督撫察明人數量給恩賞朕屢念民依特蠲租賦總期實德潤澤蒼生近見民間有建立碑亭稱頌德意者雖出羣黎感戴之誠但恐各郡皆然未免致損民力誠使閭閻殷阜則裨益良多碑亭何與焉嗣後亦宜停止江浙錢糧既經蠲豁猶慮有不肖有司借端詞訟胺削民生著該督撫嚴行禁飭至各處榷關原有則例朕舟行所至諮訪過關商民每不難于輸納額稅而以稽留關次不能速過爲苦榷關官員理宜遵奉屢頒諭旨恤商惠民豈可反貽商民之累自今應力除積弊凡商民抵關交納正稅卽與放行毋得稽留苛勒以致苦累違者定行從重處分朕早夜孜孜惟冀官吏軍民士農商賈無一人不獲其

所故于民生吏治圖維區畫務極周詳爾等可卽傳諭俾一體奉行稱朕意焉特諭

十七日欽奉

上諭朕巡省民生風俗行次浙江見省會兵民俱相和輯生齒蕃庶閭里乂安但觀民間習尚好行爭訟爭訟一興則不肖有司因緣詐索勢所必至縱或官員無所脅削而胥吏作奸究不能無私行勒取之弊小民之率連苦累者多矣夫微忿不捐搆成嫌怨小則耗損物力大則傾墮身家其爲蠹害不可勝言矜此愚民允宜深戒地方大小衙門官員亦應各簡詞訟勸導閭閻俾守分息爭共安生業又夙聞東南巨商大賈號稱輜輶今朕

行歷吳越州郡察其市肆貿遷多係晉省之人而土著者蓋寡
良由晉風多儉積累易饒而南人習俗奢靡家無儲蓄日所經
營僅供朝夕一遇水旱不登則民生將至坐困苟不變易陋俗
何以致家給人足之風爾等可傳諭將軍督撫等令家喻戶曉
務使敦本興讓崇儉黜浮兵民日益協和風俗日益淳樸詞訟
日益減少積貯日益豐盈則教治化行朕心實嘉賴焉特諭

三十八年三月

聖祖仁皇帝南巡幸浙

駐蹕杭州府湧金門內太平坊

行宮

是月十九日欽奉

上諭朕瞻念東南民生風俗特行巡省兼以黃淮爲患親閱河工比巡歷堤堰詳加相度以疏導脩築之法指授河臣刻期興作隨南涉江表徧察民依頃至蘇州府駐蹕有浙江文武官吏及在藉官員迎謁于行在言浙民望幸之心至殷且切合詞諱懇不啻再三朕勉徇輿情揚旌前發以三月十九日啓行自出京師以來一切供御之需皆出儲備其沿途日用令該衙門照各地方時價採辦一無所累于民如有官吏借名科派致擾閭閻者察實以軍法從事地方大小文武官員與扈從官員借稱親舊私相餽遺與受之人及扈從大小官員隨從人等有橫行生

事者一竝軍法從事凡經過地方百姓各安生業皆如常時務令屢無廢市隴不輒耕毋得遑遽引避方今正屆農時所過田畝勿令踐踏其軍民人等懷挾私怨受人指使擅于駐蹕處所輒行告訐者一槩嚴禁不准仍照衝突儀仗例嚴加治罪兩部卽傳諭恩從大小官員人等併行該督撫于各府州縣城市鄉村徧張告示悉行曉諭務令億兆通知以副朕體恤惠愛至意特諭

是月二十六日吏部奉

上諭朕頃自江南巡歷浙江省沿途供御悉經儲備不以纖毫取辦問聞而地方官料理夫船等項一無缺悞殊屬勤勞此等官員

有因公詐誤罰俸住俸降俸降級革職留任者著察明悉從寬免爾部卽遵諭行特諭

同日戶部奉

上諭朕以省方問俗巡歷三吳比至浙省見緣路農桑固徧隴畝而地有肥磽時有豐歉歷年正供錢糧因輸納維艱致多逋負雖已准分年帶徵而新舊之賦取給于一時恐力作之民終難于兼辦應通行蠲豁以弘庥澤除康熙三十三年以前恩詔赦免外其三十四五六七年奏銷未完民欠地丁錢糧米豆麥雜稅著一槩免徵爾部行文該督撫責令有司悉心奉行務俾均沾實惠如有官吏以完作欠詭詞侵蝕者察出定從重治罪夫朝

廷頻賜田租所以優恤民力誠使閭里之間人敦本業家有餘
儲則藏富在民朕深嘉賴可傳示官吏軍民人等令咸知悉爾
部卽遵諭行特諭

同日刑部奉

上諭朕廵視東南行次浙省因官吏軍民依戀誠懇特留蹕數日
以慰喁喁奏請之情獨念獲罪人犯身淹刑獄一干法網無由
自新茲乘輿經臨惻然矜憫用沛好生之澤聿示格外之仁該
省各屬地方有罪犯現在監禁者除十惡等真正死罪及詔欵
不赦等罪與官吏犯贓不宥外其餘自三十八年三月二十六
日以前死罪以下已結未結悉著寬釋夫省刑宥罪者朝廷之

殊恩守身奉法者小民之常分必使黎庶嚮風咸知寡過期稱
朕孳孳敎育羣生至意可行文該督撫徧傳所屬張示曉諭爾
部卽遵諭行特諭

四月初二日欽奉

上諭朕子育黎元勤求治理日孜孜以施德澤厚民生爲急務而
江浙二省尤東南要地朕時切軫念比歲以來蠲豁田賦賑濟
內荒有請必行無災不卹雖漕項錢糧向未蠲免者亦曾特旨
蠲免愛養之道備極用詳庶幾民生日益康阜用是乘輿時邁
于視河事竣巡歷江浙咨訪民間情形見淮揚一路旣困潦災
而他所過州縣察其耕獲之盈虛市蜃之贏絀視十年以前實

爲不及此皆地方有司奉行不善不能使實惠及民所以小民雖懷愛戴之誠而朝廷恩澤卒未下究朕日擊屢懷亟思拯卹截留錢糧寬免積欠另有諭旨惟各鹽差關差向因軍需繁費于正額外令在差官員以所私得贏餘交納充用今思各官孰肯自捐私橐勢必仍行苛取商瘠民困均坐此弊著將加增銀兩一槩停罷以紓商民之累其兩淮鹽課康熙三十六年曾加增四十萬兩今恐商人辦課維艱有漸致匱乏者著減去二十萬兩此外有應行應革事宜朕還都以後仍加商確次第舉行該督撫藩臬皆地方大吏亦著悉心體訪凡有可爲民興利除害者作速勘實陳奏嚴革雜派禁止刁訟然後胥吏不能作奸

良民得以安業儻官吏有悖旨妄行者許商民首告該督撫察出卽行叅奏朕視民如傷惟恐一夫不獲其所茲值海寓昇平兵革不事正當與民休息之時故特渙沛德音減徵寬稅以爲閭閻留有餘之力萬一嗣後別有急需或不得已而稍議加增想在小民亦能共諒朕懷輸將之恐後也至于江南浙江人文稱盛入學名數前已酌定增額今著于府學大學中學小學各增五名舉行一次以示獎勵人才至意爾部卽遵諭行特諭

五月十八日欽奉

上諭朕南巡至浙江見百姓生計大不如前歷年來屢將舊欠錢糧盡行豁免其被災地方槩行賑濟恩澤屢加在百姓應比徃

年豐足今反不及從前富庶皆因府州縣官剝削人民多派侵
取餽送上司或有沽名不受餽送而因事借端索取更甚凡有
微小易結應審之事牽連多人遲延索詐者甚多此等情由在
京官員亦有所聞而九卿科道無有不知其督撫不將此等情
弊厘剔察叅反將行賄官員薦舉廉正官員糾劾以致民生失
所殊失朕愛養元元之至意且畿輔近地因朕不時巡察直隸
地方竟無私派侵取情弊故人不知有私派之苦其各省督撫
若體朕愛民至意實力奉行或有不肖劣員若科道不畏人不
徇情察訪糾叅則有司何敢復行私派侵取今作何令吏治澄
清萬民樂業共享太平熙皞之治爾部會同確議具奏特諭

四十二年二月十五日

聖祖仁皇帝南巡幸浙

駐蹕杭州府湧金門內太平坊

行宮

四十三年十月初七日戶部奉

上諭朕昨歲南巡至浙江見其農桑徧野戶口蕃殖閭閻氣象較勝于三十八年巡幸之時甚爲心慰浙江省錢糧雖前此屢經蠲貸而朕車駕經臨應更敷恩寬恤俾民生益加充裕當回鑾以後卽擬免四十三年額賦因山東急賑災荒遂爾少緩曾頒有諭旨茲直省皆獲有秋特申前命康熙四十四年浙江通省應

徵地丁銀米等項除漕糧外著俱行蠲免諭旨到日該督撫卽嚴飭有司張示徧諭務使窮簷蔀屋均霑實惠地方大小官吏仍不時訓誡小民令各守分節用不論年歲豐歉咸有益藏庶無負朝廷殷殷愛養賜租給復之至意兩部卽遵諭行特諭

四十四年四月

聖祖仁皇帝南巡幸浙

駐蹕西湖臣民懼忭踴躍恭建

行殿于孤山之南

是月初七日欽奉

上諭朕頃因親閱河工濟江而南至于浙江省見民間生聚殷繁菜

畊麥隴遠近彌望農事可冀豐穰朕心用以稍慰凡車駕臨幸
之地必大敷膏澤以下逮黎元而各省錢糧屢次遞蠲浙江本
年地丁銀米又經全免無可加恩惟是刑獄爲民命攸關朕每
當重罪奏讞之時常深切矜恤今乘輿所至父老子弟夾道歡
迎而身陷囹圄之人獨自新無路朕甚憫焉浙江福建兩省庚
熙二十四年四月初八日以前凡犯罪詔款不應赦者不赦外
其餘死罪以下已發覺未發覺俱著減等發落四十三年秋審
奉旨監候緩決者一併減等發落仍開具人數奏聞爾等其體
朕爲民廵省布德好生之意卽詳慎察明遵行特諭

四十六年四月

聖祖仁皇帝南巡幸浙

駐蹕杭州府西湖

行宮

是月十一日欽奉

上諭朕頃因視河駐蹕淮上江浙兩省官員及地方紳士軍民咸環道遠迎懇請臨幸朕勉順羣情涉江而南循省風俗所至郡縣見雨暘應時麥苗蔞殖比閭樂業可冀盈寧雖山東一路尙未悉覩而江浙田疇鬱葱在望深懶朕懷方今二麥番熟正將刈獲之時一切扈從人員皆以次舟行不致踩踏誠恐百姓緣途迎送老稚扶携動盈千萬阡陌未免踐傷朕心甚爲軫

惜雖民情依戀出于憫誠但農事方殷應令所過地方悉停止
岸傍迎送且車駕來時小民業已瞻覲茲節候漸熱朕舟行乘
夜迎涼亦未可定民雖遠來無由親見爾等督撫可張示勦加
曉喻使各知悉俾無負朕重農愛民之意特諭

乾隆十六年三月初一日

皇上南巡省方幸浙

駐蹕杭州府太平坊

行宮初三日

駐蹕西湖

行宮初六日

皇上巡幸紹興東渡錢塘初八日

親詣禹陵致祭初九日

駕回杭州西湖

行宮

駐蹕十三日

皇上回鑾

十四年十月二十日內閣奉

上諭浙閩總督喀爾吉善署理浙江巡撫永貴奏請臨幸浙江省
閱海塘一摺前因江南督撫等奏請南巡特命大學士九卿
會議詢謀僉同業經降旨俞允浙江隣封接壤均係

聖祖屢經巡幸之地且海塘亦重務也今旣據該省士民感恩望
幸羣情踴躍督撫合詞代奏宜允所請于辛未年春南巡便
道至浙江省臨視塘工慰黎庶瞻依之意所至不煩供億勿事
興修勿尚華靡已詳具前旨其共喻焉欽此

十五年正月初二日內閣奉

上諭各省耗羨銀兩以備地方一切公用向因漫無稽考是以
條列章程該部歲杪察核朕思有正供而後有耗羨耗羨非
正供可比其未完之項雖應一體催徵但輸將不無拮据朕
巡幸所至地方應酌量加恩以舒民力直隸屢經巡歷今春
暨秋清蹕五臺命駕河汴明歲卽當南幸江浙山東亦所必

經所有耗羨內直隸山西河南浙江四省未完銀兩全行豁免江蘇安徽山東三省未完銀兩豁免十分之六着該督撫確查實數毋令吏胥借端那抵正耗混淆暗行侵蝕倘有朦混滋弊卽行叅奏從重治罪上司稍有徇私一併嚴加議處務使閭閻均沾實惠以普恩膏欽此

十月十四日內閣奉

上諭朕明春巡幸江浙曾經降旨每省各截留漕糧十萬石以資平糶之用今據永貴摺奏溫台各屬今歲秋收稍薄米價未免增長等語著將浙江省庚午年漕糧再截留五萬石俾糶用充裕民食有資所有截留撥運事宜仍著該撫詳悉酌籌

妥協辦理該部卽遵諭行欽此

十二月十五日內閣奉

上諭浙江海塘爲捍衛民生要務朕明春巡幸浙省意欲親臨
閱視著尚書舒赫德于江南審訛事畢之日卽赴浙江會同
該督撫等查看豫備奏聞欽此

十六日內閣奉

上諭明歲恭逢

聖母皇太后萬歲之年朕于新正恭奉

鑾輿巡幸江南浙江省方觀民入疆考績式遵

祖烈慶典斯行東南父老共效嵩呼洵昇平之盛事惟念江浙二

省襟帶江湖程途稍遠自

皇祖聖祖仁皇帝南巡以來

異數隆恩昭垂史冊迄今四十餘年朕俯從望幸之忱倍切勤民
之隱前于大學士九卿等議准兩江總督黃廷桂等一摺已
降旨諱切曉諭又特遣嚮道大臣兆惠努三等前往面傳諭
旨務從儉約一切供頓絲毫不累民間凡地方大吏職任旬
宣自能仰體朕心遵旨辦理但恐地方有司奉行不善或窮
鄉僻壤未及周知是用再行申諭各該督撫及所屬官民人
等尙其凜遵前旨共期樽節以敦善裕以導淳風如所在行
宮與其遠購珍奇雜陳玩好不如明牘淨几灑掃潔除足供

信宿之適也經過道路與其張燈懸綵徒侈美觀不若蔀屋茅簷桑麻在望足覘盈寧之象也閭閻通衢人烟稠密正以見憇遷有無之樂不得因道路湫隘俾遷移廬舍或至商民失業也朕翠華所至念切民依惟期宣達羣情勤求治道上以奉

慈顏之悅豫下以答黎庶之瞻依凡屬虛文浮費概宜實力摒除用光鉅典其扈從滿漢文武大臣官員侍衛等皆當奉公守法不得與地方官往來交際潛通餽遺兵丁以及隨從人等著該管大臣各嚴加約束經行所至不得稍有滋擾春苗遍野無得踐踏違者察出從重治罪務令白叟黃童普沾膏澤

共樂恬熙副朕問俗觀風行慶施惠之至意欽此

十六年正月初二日內閣奉

上諭朕巡幸江浙問俗省方廣沛恩膏聿昭慶典更念東南貢賦甲于他省其歷年積欠錢糧雖屢准地方大吏所請分別緩帶以紓民力而每年新舊並徵小民終未免拮据朕宵旰勤勞如傷在抱茲當翠華親莅倍深軫切用普均沾之澤以慰望幸之忱著將乾隆元年至乾隆十三年江蘇積欠地丁二百二十八萬餘兩安徽積欠地丁三十萬五千餘兩悉行蠲免俾官無墨悞民鮮追呼共享昇平之福夫任土作貢歲有常經自應年清年歉江蘇積欠乃至二百二十餘萬之多

催科不力有司實不能辭其咎而疲玩成習豈民間風俗之
澆漓尚有未盡革歛朕以初次南巡故特加恩格外嗣後該
地方官務宜諄切勸諭加意整頓其在小民亦當湔除舊習
勉効輸將勿謂曠典可希冀屢邀而惟正之供任其逋負也
其浙江一省雖額賦畧少于江蘇而節年以來並無積欠豈
犬牙相錯之地不齊乃至是歛此具見浙省官民敬事急公
之義而江蘇官民所宜懷慙而效法者也朕甚嘉焉著將本
年應徵地丁錢糧蠲免三十萬兩以示鼓勵各該督撫其仰
體朕惠愛黎元之意嚴飭所屬實力奉行使閭閻咸沾實惠
倘有不肖官吏以還作欠希圖侵蝕察出卽行糾叅從重治

罪並將此通行曉諭知之欽此

十三日內閣奉

上諭朕此次巡幸江浙聞士民父老念切近光其闢闢通衢人
烟輜輶之所瞻仰者既足慰望幸之忱而朕亦得因以見間
間風俗之盛誠恐地方有司因慮道路擁擠或致先期攔阻
用是特行申諭如經過村巷果屬湫隘難容自應量爲曉諭
令其散處路旁毋致喧擾若道路寬廣清蹕所經毋虞擁塞
不得槩行禁止以阻黎庶瞻就之誠著卽傳諭各督撫知之
欽此

二十一日內閣奉

上諭朕此次南巡所有經過直隸山東江南浙江地方各營汎
兵丁有派辦差務者著查明賞給兩月錢糧以昭恩賚欽此

二十二日內閣奉

上諭朕翠華南幸所有直隸山東江南浙江等省承辦差務之
文武官弁宜一體加恩著各該督撫查明咨部凡有罰俸住
俸降級之案俱准其開復其無此等叅罰案件者各加一級
欽此

二月初一日內閣奉

上諭朕問俗觀風南巡江浙清蹕所至廣沛恩膏更念三吳兩
浙爲人文所萃

皇祖聖祖仁皇帝屢經巡幸嘉惠膠庠試額頻加覃敷敎澤朕法
祖省方鑾輿斯蒞式循

茂典用示渥恩所有江蘇安徽浙江三省本年歲試文童府學及
州縣大學著增取五名中學增取四名小學增取三名舉行
一次該部傳諭各該學政慎加蒐擇拔取真才副朕育才造
士至意欽此

初十日浙江學政臣雷鋐至淮上恭請

聖安面奉

上諭浙江省生監有進獻詩賦者爾可擇其有學有品者代爲進
呈欽此

十七日內閣奉

上諭朕清蹕南巡行慶施惠所有駐防旗人亦應一體加恩著各督撫將軍等將江寧京口浙江等處駐防滿洲漢軍官兵年七十八十以上者查明分別賞賚欽此

二十日內閣奉

上諭孫灝從前革職之案尙無實在劣蹟且年力猶屬壯盛著加恩以少詹補用欽此

二十七日奉

旨協辦大學士梁詩正之父梁文濂著賞給緞四疋貂皮六張欽此

同日奉

旨進詩之原任太僕寺卿張映辰編修梁啓心著各賞給綬一
疋貂皮二張欽此

三月初一日內閣奉

上諭經史學之根柢也會城書院聚饗庠之秀而砥礪之尤宜
示之正學朕時巡所至若江寧之鍾山書院蘇州之紫陽書
院杭州之敷文書院各賜武英殿所刊之十三經二十二史
一部資髦士稽古之學欽此

初二日內閣奉

上諭此次接駕人內革職御史范咸員外郎陳祖勲知府金以

成姜士嵩同知徐志岩州同烏仲州判張宗洙俱著加恩賞
給原銜欽此

十一日內閣奉

上諭朕問俗省方翠華所至黃奇台背策杖懼迎雖已于途次
各加恩賜而優恤高年推恩宜渥著各督撫查明經過州縣
男婦七十以上者照從前恩詔之例分別賞賚欽此

同日內閣奉

上諭此次考中之謝墉陳鴻賚王又曾皆取其最精者且人數
亦不多著加恩特賜舉人授爲內閣中書學習行走令其與
考取候補人員一體補用併仍准其會試欽此

大學士公臣傅恒等謹

奏查得去年

皇上豫省閱兵時曾賞演陣之巡撫大綏三疋總兵官城守尉等大綏各一疋八絲綏各一疋參將佐領等八絲綏各一疋都司守備防禦等金獎武牌各一面千總把總等銀獎武牌各一面驥騎校滿洲兵一月餉銀綠旗兵銀獎武牌各一面此次浙江省演陣大臣官員兵丁賞賜之處道旨酌議亦照前賞賜外再豫備步射騎射花馬箭放鳥鎗騎射跑解舞簾牌官員兵丁等亦照此賞賜內有演陣而又豫備各樣技藝官五員兵二名臣等酌量議增于伊等演陣

之列賞賜等項外增賞官員貂皮各一張兵丁銀獎武牌
各一面謹將應賞大臣官員兵丁人數與物件數目另繕
漢字清單一併進

呈俟

命下之日所賞貂皮綴疋金銀獎武牌赴廣儲司支領賞給爲
此謹

奏乾隆十六年三月十二日奉

旨依議欽此

十三日內閣奉

上諭朕省方觀民茂求上理前因浙江省士庶誼切急公正供概

無宿逋頒諭嘉獎誕布特恩頃翠華蒞止周覽土風雖與三
吳繡壤相錯而間閭趨尚較吳稍樸但浮競之習舉所不免
其蓋藏未裕均也凡爾封疆大吏暨監司守令俱有教養斯
民之責當以移風易俗爲已任詎惟簿書期會爲克盡乃職
其在小民則宜崇實去奢雍睦敦讓相勉于孝弟力田以臻
仁壽之城將見化行俗美有進而日上者茲當旋蹕用申訓
諭其善承朕意毋怠欽此

同日內閣奉

上諭此次杭州駐防滿洲官員兵丁內沿途坐臺隨營當差以
及演陣人員俱已加恩分別賞賚但在城駐劄官員兵丁此

際亦各奮勉當差著加恩于官員兵丁較演陣人員賞資之數減半分開賞資欽此

三十日內閣奉

上諭大學士張允隨病故員缺一時未得宜補授之人原任大學士陳世倌從前罷任尚無大咎上年已復予原銜此番於行在屢經召見雖年過七十精力尚健且係舊人仍著入閣辦事欽此

二十二年二月二十七日

皇上南巡省方幸浙

駐蹕杭州府西湖

行宮三月初六日

皇上回鑾

二十年五月十四日奉

上諭前尹繼善奏請明歲南巡預備一切事宜已降旨俟西北兩路軍務告竣後頒發諭旨遵行此時有預備處只當從容籌畫無事張皇今兩路征兵所至準噶爾諸部望風投款接踵歸誠看來卽日已可就緒省方問俗自屬應行之事江浙地境毗連所有應行預備事屬相等但俟降旨後始行籌備未免急遽著傳諭喀爾吉善或當先期飭備前經臨幸各處止須畧加葺治以資頓宿備覽觀足矣上次過于繁費此番

俱可不必紹興毋庸前往卽西湖中所需

皇太后及朕御舟各備一二隻其餘隨侍各載小艇毋須多備船座以滋糜費其馬匹一項江省已令將現需馬匹開數具奏交軍機大臣代爲籌辦浙省需備馬幾何不敷幾何亦將如何委員採買如何定價之處詳悉奏聞一併交令籌辦至一應費用若扣各屬官養廉及令衆商捐資皆斷不可行浙省商力尤非兩淮可比兩淮尚不准捐輸何況兩浙該督可行文普福于應解內務府閒欵內撥銀十萬兩預備浙省辦差之用諸事較前務加簡樸稱朕觀風省俗之意其或過于糜費務事華飾不惟不能邀朕嘉悅將轉致取咎矣該督酌量

應于何時前赴浙省親爲料理先期奏聞將此詳悉傳諭知之欽此

六月初三日奉

上諭明年南巡一應預備事宜已降旨該督撫等令其樽節妥辦矣所有各處行宮內從前皆陳設玩器此等物件或係假借應用或用重價購買承辦之員往往張皇其事藉以邀結上司而對人則苦稱賠累卽鄉紳舖戶亦紛然傳爲口實在朕不過偶爾駐蹕而伊等先期多方覓置至臨時又或照料不及易致遺失甚至不肖家人胥役卽有乘間藏匿者種種情弊俱所不免此次南巡除揚州之高旻寺行宮原係商人

自行置辦應仍聽其預備但須交收清楚外其餘各處行宮
槩無得陳設玩器惟潔淨軒牕布置裯褥足供頓宿可矣若
羅列賈鼎以圖飾觀甚屬無謂殊可不必將此傳諭該督撫
等務各凜遵倘仍前預備必于尹繼善喀爾吉善等是問欽
此

十三日內閣奉

上諭大學士陳世倌協辦大學士蔣溥等奏稱江浙士庶望幸
情殷請于明歲再舉南巡一摺朕自乾隆十六年巡幸吳越
迄今已越五載該督尹繼善喀爾吉善等均曾具摺奏請朕
因西師尚未凱旋未經允准現今虜功迅奏荒服敕寧南省

民風吏治時屢于懷而高堰堤工尤數郡生靈攸繫上年告竣以後正當親加察勘前降旨于明歲春月展謁

孔林著允大學士等所請於禮成之後敬奉

聖母皇太后鑾輿順道前往江浙以抒勤民之隱而慰望幸之忱朕省方觀民入疆考績維期勤求實政宣達羣情一切供頓俱出內府絲毫不以擾民地方官毋得指名儲備令衆商捐輸及扣各屬養廉察出定行嚴加究處前者巡幸南省時屢飭各督撫務從簡樸而所至尚覺過于華飾喧溷耳目此次行宮及名勝憩息之地悉仍舊觀但取灑掃潔除概毋增一樣一瓦毋陳設玩器城市經塗毋張燈演劇踵事增華巡覽

所及各督撫等果能綏輯并疆康父蒸庶俾人敦禮讓俗慶
盈寧朕自深爲嘉悅若其徒事華靡致飾觀美耗有用之才
侈無益之費適以自滋罪戾甚無取焉各督撫及所屬官民
人等尚其善體朕心以副朕觀風問俗行慶施惠之至意摺
并發欽此

七月初七日內閣奉

上諭朕時巡江浙已屢降旨令該督撫等毋事浮靡務從簡樸
並飭禁一切商捐陋習乃聞前次南巡時浙省辦差至有當
商捐費者此斷不可著再行曉諭嚴加禁止朕清蹕所經觀
民間俗關政治之大端卽動用數十萬正帑亦何不可而必

取給于捐項乎該督撫等宜仰承德意撫恤黔黎苟徒以鋪
張華麗炫潤耳日至派累各商舖戶使不肖胥役乘機滋擾
侵肥是以惠民之典而轉以累民豈朕巡幸本意亦豈所以
慰兆庶望幸之忱耶若仍出此朕惟引以爲戒不當俯從所
請矣如西湖中船隻自

皇太后及朕御用一二舟外其隨侍人等原可各載小艇毋庸多
備船座以滋糜費再所過城市民居因迎候鑾輿各出誠敬
之意于其門前香燈懸綵者自可不禁其行宮陳列玩器蘇
揚城郭街衢間張設棚帳已有旨禁飭至沿途水次從前俱
設燈船戲船臺閣俚俗游玩之具此不過地方吏役及民間

游手好事之徒藉名苛斂尤當通行嚴禁該督撫等其稟遵
毋忽欽此

二十一年閏九月二十六日內閣奉

上諭朕明春巡幸江浙所有供宿頓次皆出自帑項絲毫不以
累民第扈從官兵以及外省接駕人等輒驛雲集經過地方
錢米價值恐一時或至騰踊著將運京銅鈺兩省各截留十
萬觔添爐鼓鑄減價發賣并將該二省應運本年漕糧各截
留五萬石減價平糶以裕民間日用該督撫其各飭屬員實
心經理毋使吏胥滋弊務俾均沾實惠該部卽遵諭行欽此

十月二十八日內閣奉

上諭程盛修奏南巡接駕之在籍官員請限以品級並守制諸臣停止接駕一摺此所見非是朕稽古時巡省方問俗黃童白叟皆得懽迎道左共申愛戴其在籍大僚夙叨恩遇自當遂其觀光之願卽小臣中疎遠罷斥者旣曾沾一命亦何至禁阻令不得與齊民齒此與朝儀之定等威以明體制固不同也雖此等接駕人員不無望恩倅澤之意然在朕自有權衡上次南巡時亦俱就其罷斥情罪酌量分別其間有棄瑕錄用者餘或加恩復其原銜或降等給以頂帶未嘗槩得濫邀異數此爾諸臣所共知其見試問有因接駕復用而劣蹕仍前昭著殃及百姓者誰乎至于守制諸臣效奉作忠均關

至性何曾概令其必出迎鑾然其中有將屆卽吉之期或林
墓之事已畢者而竟閉門不出于心自有所不安卽如親老
終養者自應不離親側然里門咫尺而不令其一展其葵向
之誠乎且此等亦各揆時度理卽不能來迎者原未嘗罪一
人也程盛修旣有此奏恐外間無識之人或未免尚有拘牽
之見可將此通行曉諭知之欽此

十一月二十九日內閣奉

上諭朕恭奉

皇太后鑾輿南巡江浙于來年正月十一日起程欽此

二十二年正月初二日內閣奉

上諭今春朕恭奉

皇太后鑾輿載臨江浙間俗省方行慶施惠而東南黎庶望幸情殷茲當翠華發軔之初宜沛渥恩用昭盛典乾隆十六年肇舉南巡曾頒恩諭將江蘇安徽十三年以前積欠地丁悉行蠲免浙江省因無積欠特免應徵地丁三十萬兩以示鼓勵亦欲思愷澤覃敷官無革悞民免追呼共享昇平之福乃邇年來江浙間被偏災其積欠未完之數又復不少雖維正之供歲有常經不宜任其逋欠然天時之不齊亦非盡小民之過也該二省去歲秋成豐稔糧價平賤據地方大吏陳奏並清問所及民物康阜井里恬熙朕心實爲忻慰但閭閻蓄藏時

屢宵旰若令新舊並輸于民力未免拮据著將江蘇安徽浙江乾隆二十一年以前積欠未完地丁銀兩概予蠲免該督撫等其嚴飭所屬實力奉行毋令胥吏侵蝕中飽務俾恩膏普逮實惠均沾稱朕懷保黎元至意該部卽遵諭行欽此

十八日內閣奉

上諭朕奉

皇太后鑾輿載臨江浙經過直隸山東各州縣男婦年七十以上者俱著查明照從前恩詔之例分別賞賚欽此

三十日內閣奉

上諭大學士史貽直謝事歸田協辦大學士尚書梁詩正請假

終養在籍均屬安靜可嘉茲值南巡前來接駕俱著加恩照
其品級在家食俸侍郎錢陳羣從前在京供職勤慎今養疴
林居亦著加恩在家食俸以昭眷念舊臣之意欽此

二月初一日內閣奉

上諭朕稽古省方載臨江浙將以勤求民隱廣沛恩膏是以啓
鑾之先卽經降旨將該二省乾隆二十一年以前積欠悉行
蠲豁而時當春令東作方興水陸經行一切除道挽舟雖皆
按丁給值然終未免有需民力入疆伊始軫念方殷所有江
南浙江經過各州縣地方本年應徵地丁銀兩俱著加恩蠲
免十分之三此內或有去秋被水歉收者蠲免十分之五該

督撫等其飭屬查明實力奉行稱朕加惠黎元至意欽此

初二日內閣奉

上諭朕省方觀民再臨江浙行慶施惠蔀屋均霑其地方各官之承辦差務者亦宜加以優敘以昭盛典所有江浙二省辦差文武員弁任內罰俸住俸降級之案俱著加恩准其開復其無此等叅罰者俱各准其加一級欽此

同日內閣奉

上諭朕奉

皇太后鑾輿載巡江浙所至黎庶愛戴情殷夾道焚香歡迎輦路而鶴髮皤然扶携恐後尤堪軫念所有江浙二省男婦年七

十以上者俱著加恩照從前恩詔例賞賚以示優老引年之
意欽此

初三日內閣奉

上諭朕清蹕時巡賈澤疊沛所有江浙二省派出辦差之綠營
兵丁俱著加恩賞給兩月錢糧以昭恩賚欽此

初八日奉

上諭江浙二省獄滋繁陳臬之司素稱劇任茲朕巡省所至
覃布恩膏黎庶均沾閭閻愷樂而有罪之人囹圄桎梏實由
自取亦何恤焉但念獄一成而不變其中奸民之犯法者固
多而無知誤蹈之人亦所時有況未抵于重辟尚可望其自

新用播德音以符寬大所有江蘇安徽浙江等屬軍流以下
人犯俱著加恩各予減等發落從此案牘一清在問刑各官
當益勵精勤期于明慎而凡爾百姓更宜各安本業勉爲良
民勿謂曠典可以倖邀而輕國法也欽此

同日內閣奉

上諭朕敬承 •

祖德問俗觀風嘉惠黎元培植士類今者乘春佈令載蒞東南濟
濟青衿來迎道左因念三吳兩浙民多俊秀如以百年教澤
比戶書聲應試之人日多而入學則有定數甚有皓首而困
入童子試者其無遺珠之惜耶宜循舊典再沛渥恩其將江

蘇安徽浙江三省本年歲試文童照乾隆十六年例府學及州縣大學增取五名中學增取四名小學增取三名各該學政其慎加甄錄稱朕樂育人才之至意焉欽此

十五日內閣奉

上諭現在隨同護軍營當差杭州協領著賞綬四疋防禦以上等官各賞綬三疋驍騎校兵丁人等俱著賞給一月半錢糧沿途坐臺江寧京口杭州乍浦協領叅領著各賞綬三疋防禦以上等官各賞綬二疋驍騎校兵丁人等著賞給一月錢糧欽此

同日奉

上諭朕奉

皇太后鑾輿再臨江浙廵省所至惠澤頻頒而優老引年加恩尤渥其江寧京口杭州乍浦等駐防旗人男婦年七十以上者亦著照從前恩詔例一體賞賚以昭慶典欽此

大學士公臣傅恒謹

奏道

旨賞賜浙江省合操大臣官員兵丁之處查十六年

皇上賞賜浙江省大臣官員兵丁自將軍總督以下防禦等官以上俱經分別賞給綏定驍騎校兵丁俱經賞給一月錢糧其千把外委綠營兵丁賞給獎武銀牌今此次浙江省合操

大臣官員兵丁俱照十六年賞過例賞給再

皇上前步射騎射對撲馬上打鎗官兵應入于合操官兵一體
賞給所有應賞之合操等項大臣官員兵丁數目所賞之
綏疋錢糧銀牌數目另開漢字單一併進

呈俟

命下之日其賞給驍騎校及滿兵之一月錢糧亦照前交于
行在戶部將兩淮鹽項銀庫內動支賞給除應賞之綏疋銀
牌由廣儲司支領賞給外是日舞簾牌之浙江福建省分

綠營官兵前蒙

皇上親閱時已經蒙

恩賞過此次應母庸賞給爲此謹

奏請

旨乾隆二十二年二月二十九日奉

旨著照所議賞欽此

行在禮部謹

奏爲請

旨事乾隆二十二年二月二十八日內閣奉

上諭朕昨至浙江省城禮部未奏請遣祭已故大學士徐本詢
其故則以未入賢良祠例不致祭爲對徐本歷事

兩朝宣力多年勤慎懋著卽如前者過常州時已故之巡撫潘思

纂禮部尚猶奏請徐本視瀋思纂爲何如耶朕巡幸所經郡
縣名臣舊輔皆卽致祭乃國家念舊酬功之典該部自當慎
重辦理何得膠柱鼓瑟乃爾徐本著入本省賢良祠並著該
部奏請遣官致祭欽此欽遵抄出到部臣部遵卽行知該督
撫辦理去後謹將隨

駕滿漢文武大臣職名繕寫綠頭籤進

呈恭候

欽點一員前往致祭爲此謹

奏請

旨乾隆二十二年三月初一日奉

旨著派秦蕙田欽此

三月初一日內閣奉

上諭江浙二省積欠地丁銀兩前已有旨豁免而浙江省所免獨少足見黎庶素屬急公今巡省莅止因命悉查各項則尙有乾隆十八十九二十等年各屬未完緩徵及蠲剩漕項銀十八萬九千餘兩二十年分杭嘉湖紹四府屬縣場未完借欠籽本銀三萬七千八百餘兩十八二十年分各衛所未完屯餉銀六千四百餘兩並海寧縣未完沙地公租銀二千餘兩著加恩概行豁免該督撫等其董率屬員實力奉行毋令胥役里長蝕中飽副朕曲體惠鮮之至意欽此

初三日奉

上諭此次駐防杭州官兵內沿途坐營隨營辦差演陣人等俱已加恩分別賞給在城官兵尚未得賞其間伊等俱各奮勉辦差著加恩與演陣官兵減半賞給欽此

初四日內閣奉

上諭明日覆考諸生顧震等五十人其進獻詩冊之二等諸生李如蘭等五十一人一併考試欽此

初八日內閣奉

上諭浙江進獻詩賦考取一等之童鳳三陳文組顧震錢受穀著照乾隆十六年之例俱特賜舉人授爲內閣中書學習行

走與考取候補人員一體補用其二等之沈初等十二名著各賞緞二疋欽此

十八日內閣奉

上諭朕稽古省方乘時布澤翠華所至賜賚蠲租而省會駐蹕之地加恩宜渥其將江南之江寧蘇州浙江之杭州附郭諸縣本年應徵地丁銀兩悉予豁免用昭行慶施惠之盛典該部卽遵諭行欽此

二十八日內閣奉

上諭

浙海之神自雍正八年海塘告成時

特加褒封

勅於海寧縣地方建廟崇祀邇年以來海波不揚塘工鞏固朕省
方浙中親臨踏閱見大溜直趨中小亹兩岸沙灘自爲捍禦
濱海諸邑得慶安瀾利及生民實資

神明顯佑應于杭州市城之觀潮樓敬建海神之廟以昭朕崇
德答佑至意應行事宜該部查例具奏欽此

七月十四日內閣奉

上諭今春南巡接駕廢員內酌量情罪較輕者加恩分別賞給
職銜用廣行慶施惠之典所有胡定虞欽元龔錫輅趙琳徐
以豐沈瀾汪垕馮景曾馮渠王賓孔興漸徐錦于文駿黃昌

遇施敬勝康廷道胡沂蕭濟胡彥輔郭錦春謝禮朱元彬蔣
尚憲孫璋劉晏于文濬張廷發王瑜楊明楊成龍馬正蘇芳
張高萬世洪等三十四員俱著照原銜賞給頂帶馮元欽吳
龔嚴裕銓余騰蛟夏宗瀾朱叔權陳克繩王煥陳詩劉炳張
秉綸劉曰章沈震世汪疇李百奎韓楷張九鈞吳日華曹守
垣湯登鰲李九標吳卓黃宜載謝祖庚梁卿材焦作新俞垂
宋文鑑楊高士馬澤程國棟陳學沆陳基姜之瑜梅廷訓卞
灤趙康吳鶴峙胡世科葛淳王鑑黃家甲程元度金世越王
林顧楠宋模宋應麟黃守箴鄭嘉忠曾曰環蔣禹敷金枚臣
顧紹愚黃元吉等五十五員俱著照伊原銜降一級賞給頂

帶官爾勸著照伊原銜降四級賞給頂帶丁廷讓著照伊原
銜降三級賞給頂帶戚振鷺著照伊原銜降二級賞給頂帶
金文淳著該部行文調取來京引見欽此

二十七年三月初一日

皇上南巡幸浙

駐蹕杭州府太平坊

行宮初二日

閱視海塘

駐蹕海寧陳氏安瀾園初四日

駕回杭州

駐蹕西湖

行宮十三日

皇上回鑾

二十六年十月初三日內閣奉

上諭朕明春恭奉

皇太后聖駕南巡著照丁丑年例于江浙兩省冬兌漕糧內各截留十萬石在于水陸駐蹕地方分廠平糶著漕運總督及各該督撫會同妥協辦理該部遵諭速行欽此

十二月初四日內閣奉

上諭朕恭奉

皇太后鑾輿巡幸江浙于明歲正月十二日起程欽此

二十七年正月初二日內閣奉

上諭今春朕恭奉

皇太后鑾輿巡省江浙便道閱視河工海塘與封疆大臣講求吏治民生諸要務念昨冬恭逢

慈恩覃被之餘正東南士民望幸情殷之候翠華所過宜沛隆施益光

慶典著將江蘇安徽浙江三省自乾隆二十二年起至二十六年止所有節年災田緩徵及未完地丁各欠項照二十二年例概予蠲免該督撫等其嚴飭所屬悉心核實奉行俾閭閻膏

澤均沾母致更胥中飽副朕錫類推恩至意該部遵諭速行
欽此

二月初四日內閣奉

上諭朕恭奉

皇太后鑾輿巡省江浙前已特頒恩旨將該二省積欠地丁全行
豁免茲入疆伊始慶澤宜行所有江南浙江水陸經過地方
本年應徵額賦俱著加恩蠲免十分之三此內或有去秋被
水歉收者蠲免十分之五該督撫等其董率屬員實力奉行
稱朕子惠黎元至意該部遵諭速行欽此

同日內閣奉

上諭朕清蹕時巡幸昭慶典所有江浙二省派出辦差委丁著
加恩賞給兩月錢糧以示恩賚欽此

十二日內閣奉

上諭朕此次南巡所有江浙二省辦差文武各官任內罰俸住
俸降級之案俱著加恩准其開復其無此等叅罰案件者著
各加一級以昭慶典欽此

十七日內閣奉

上諭朕奉

皇太后鑾輿南巡江浙行慶施惠愷澤宏敷而優老引年推恩宜
渥所有江浙二省及經過地方男婦年七十以上者俱著加

恩照從前恩詔例一體賞賚以廣

慈福欽此

同日內閣奉

上諭朕稽古省方推

恩錫福其江寧京口杭州乍浦等駐防旗人男婦年七十以上者亦著照從前恩詔例一體賞賚以敷慶澤欽此

十八日內閣奉

上諭向來巡幸所至地方大吏預備燈船烟火頗覺繁俗頃在揚州適以哈薩克陪臣入覲聊示內地民情和樂之意是以聽其預備倘蘇杭等處悉仿而行之更屬不必朕省方觀民

勤求治理卽以幾暇適情則山川名勝儘足以供吟眺之資
又何事徒滋煩費爲耶將此傳諭知之欽此

十九日內閣奉

上諭沈德潛錢陳羣著各賞緞四疋鄒一桂徐杞著各賞緞三
疋錢維城之父錢人麟著加緞二疋欽此

二十一日內閣奉

上諭扈蹕南巡之漢大臣籍隸江浙二省者著于回鑾時酌量
道路所便請假歸省欽此

二十五日奉

上諭習寄許王猷著各賞緞二疋諸錦梁同書許集朱桓邵齊

齋陸樹本許焞柏謙毛詠郭孫順沈齊禮馮秉彝唐淮沈咸熙趙升言如洙嚴源齋章有大孫宗溥馮浩孫岐福俱著各賞綬一疋其進獻黃山圖之員外郎許蔭材進獻龍井見聞錄之舉人汪孟鋗俱著各賞綬二疋欽此

二十九日內閣奉

上諭三吳兩浙文風素盛前此清蹕時巡嘉惠膠庠頻增試額茲朕敬奉

皇太后安興載莅南服仰惟

慈慶之綿臻益廣作人之雅化宜循舊典以示渥恩其將江蘇安徽浙江三省本年應試文章府學及州縣大學增取五名中

學增取四名小學增取三名各該學政務宜詳加校閱遴拔
真才稱朕樂育甄陶至意欽此

同日內閣奉

上諭朕稽古省方乘春布令而清理庶獄矜恤尤深用沛德音
式昭盛典所有江蘇安徽浙江三省軍流以下人犯俱著加
恩各予減等發落凡親民之吏其諄切告誡俾知改過自新
共享太平之福欽此

三月初五日內閣奉

上諭浙江進獻書冊之監生朱方謁童生呂師說言世永俱著
賞綬一疋欽此

初六日內閣奉

上諭吳鳴玉王世芳俱著賞綬一疋欽此

初十日內閣奉

上諭浙江進獻詩賦考取一等之進士孫士毅舉人汪孟銅俱著授爲內閣中書遇缺卽補沈初王鑾俱著特賜舉人授爲內閣中書學習行走與考取人員挨次補用其二等之李旦華等十三名著各賞綬二疋欽此

十一日內閣奉

上諭此次南巡兩淮辦差商衆已降旨獎賞而浙商亦有承辦差務巡省所至宜一體加恩以敷慶澤著將嘉松寧紹等所

運銷引鹽每引各加五觔以一年爲限俾民食足而商力紓
稱朕恤商愛民至意欽此

十二日內閣奉

上諭孫人龍邵祖節汪憲許樞汪廷藻汪鵬飛孫廷槐來謙鳴
吳謙鋐沈嘉徵金潮任應烈姜士崙蔣大成蔣祝胡際泰汪
師韓汪彬俱著賞綬一疋欽此

十三日內閣奉

上諭浙江敷文書院和詩之翟灝朱大勲成城王誥李旦華孫
士毅汪孟鋗邵昌臯徐琰茅德芬祝德麟阮慶榮俱著各賞
荷包一對欽此

十七日奉

上諭進獻詩冊入選之梁同書沈咸熙孫宗溥嚴源齋馮浩陸樹本邵祖節趙升汪憲汪師韓王世芳唐淮吳謙誌已經賞賚外其吳省欽周大樞著各賞綬一疋欽此

大學士公臣傅恒等謹

奏遵

旨查上次賞賜浙省亮兵大小官員兵丁人等將軍總督以下防禦以上綠營大小官員俱經分別賞賜綬疋驍騎校兵丁俱各賞給一月錢糧千把外委綠旗兵丁賞賜獎武牌上次浙閩簾牌兵馬上鎗兵丁俱賞賜獎武牌帶領此項

兵丁官員分別賞賜緞子金牌此次調操浙江滿營綠營
大小官員兵丁再浙閩篆牌兵馬上鎗兵丁並帶領此項
兵丁官員俱照上次賞賜鳥鎗兵中三鎗者五人每人賞
給銀牌二面中兩鎗者五人每人賞給銀牌一面所有應
賞大小官員職名兵丁數目賞賜緞疋錢糧金牌銀牌數
目另繕漢字單一併進

呈俟

命下時所有賞給驍騎校滿兵一月錢糧銀兩支

行在戶部于兩淮鹽項銀兩內動用賞給所有賞賜緞子金
牌從廣儲司支取賞給爲此謹

奏奉

旨莊有恭著照將軍總督例賞賜餘依議欽此

二十七日內閣奉

上諭朕恭奉

皇太后安輿臨幸江浙翠華所至蠲賚疊加而省會駐蹕之地宜循茂典載沛渥恩其將江南之江寧蘇州浙江之杭州附郭諸縣本年應徵地丁銀兩悉予豁免用昭行慶施惠省方勤民之至意該部遵諭速行欽此

三十年閏二月初四日

皇上南巡幸浙

閱視海塘

駐蹕海寧陳氏安瀾園初七日

駕幸杭州

駐蹕

行宮二十日

皇上回鑾

二十八年十二月十七日內閣奉

上諭兩江總督尹繼善等合詞具奏請于乾隆乙酉年再舉南
巡之典以慰臣民願望一摺朕惟江浙地廣民殷一切吏治
農功均關要計且襟江帶河濱湖近海之區籌護澤國田廬

無一不重繫宵旰前以壬午歲恭奉

安輿時巡周覽凡淮河水誌節宣牖壩啟閉以及杭屬塘工勘建
柴石料段諸事宜曾與封疆大吏目擊手畫以期利濟羣生
年來疊經督撫等疏報下河郡邑汎水恬流並無漫溢惟是
浙中海潮漲沙雖有起機大溜尚未趨赴中亹是深所屢念
而新修柴石諸塘亦當親閱其工以便隨時指示又近日特
遣大臣督修水利如濱河荆山橋等處亦爲數省灌輸喫緊
關鍵所以驗前功而程後效正惟其時矧東南歲事頻告豐

登洪惟

聖母皇太后福履康寧彌增純嘏於是承

歡行慶答士民望幸之忱稽典實爲允協著照所請于乙酉之春
諭吉南巡其河工海塘應親臨省視者卽行先期預備至前
次燈綵繁文暨扈從人員僱覓巨舟簽佔公館諸禁已屢頒
諭旨卽朕所過行宮道路距上屆爲日匪遙祇須灑掃潔燭
足供頓憩不得稍事增華勞費副朕仰承

慈豫俯順輿情之至意將此通諭各該衙門知之摺並發欽此
二十九年九月二十五日內閣奉

上諭朕明春恭奉

皇太后聖駕南巡著照從前之例于江浙二省冬兌漕糧內各截
留十萬石在水陸駐蹕地方分廠平糶卽令漕運總督及各

該督撫妥協辦理該部遵諭速行欽此

十月二十三日內閣奉

上諭朕明春恭奉

皇太后安輿巡幸江浙于正月初九日起鑾所有一應事宜著各該衙門照例預備欽此

十一月十二日內閣奉

上諭明春南巡江浙所過直隸山東及江浙等省地方其應辦差務原不過就屬員中酌量派委非各屬各員皆有承辦之責卽派出人員于緊要民事自可先期趕辦俾案牘速清方爲急公之道乃聞向來有司故習率以差務展限爲詞所有

民間詞訟等案任意稽延不爲尅期完結豈朕察吏安民本
意著傳諭各該督撫等卽行轉飭所屬凡應理事件毋論派
委不及者固不得因循推諉卽派出人員其應辦之事亦當
乘此封印前後加緊料理倘有藉名遲滯以易結之案遷延
貽悞必待差竣辦理者卽應力破情面加之創懲使小民不
致羈留拖累以副封疆表率之任朕于該督撫等有厚望焉
欽此

三十年正月初二日內閣奉

上諭今春朕恭奉

皇太后安與四省江浙東南黎庶幸情殷宜布渥恩用光盛典

前此三經臨幸恩旨疊頒所有江南省積欠地丁等項蠲免至二百餘萬兩維時地方大吏率多遵循舊例例所應蠲者不論災熟積欠並予豁除而于因災緩帶之項其中有例不准蠲者轉未獲一體邀恩于情理未爲允協因思成熟地畝當年出產本豐自不難踴躍輸將年清年欵其陳積未完者實不免預覬恩膏有心觀望若因災停緩之糧勢由歲歉不齊致滋逋負初非玩戶抗延之比今翠華所過慶典聿修而此等祲薄窮黎未蒙減澤朕心深爲軫念著加恩將江蘇安徽乾隆二十五年以前節年因災未完蠲剩河驛俸工等欵並二十六七八三年因災未完地丁河驛等欵以及二十八

年以前節年因災未完漕項暨因災出借籽種口糧民借備
築堤堰等銀一百四十三萬餘兩又籽種口糧內米麥豆穀
十一萬三千餘石概予蠲免至浙江一省額賦本較江南爲
少其積欠亦屬無多著將乾隆二十六七八三年因災未完
地丁銀兩並二十七年屯餉沙地公租二十六七兩年未完
漕項等銀一十三萬二千五百餘兩又二十八年借給籽本
穀一萬三千七百餘石加恩悉行蠲免以均惠悅該督撫等
其董率所屬實力詳查妥協副朕嘉予元元至意倘有不肖
胥吏從中舞弊影射侵漁察出卽與嚴參從重治罪該部遵
諭速行欽此

二月初七日內閣奉

上諭朕恭奉

皇太后安輿四巡江浙啟鑾之前已特頒恩旨將該二省積年緩
帶未完銀糧全行豁免茲當入疆伊始宜敷愷澤以昭盛典
所有江南浙江水陸經過地方本年額賦俱著加恩蠲免十
分之三該督撫等其率屬實力妥辦稱朕觀民行慶至意該
部遵諭卽行欽此

初八日內閣奉

上諭朕恭奉

皇太后安輿巡幸江浙翠華所至愷澤覃敷而優恤高年推恩宜

諭著將江南浙江二省男婦年七十以上者俱照從前恩詔
之例一體賞給以示恩賚欽此

初十日內閣奉

上諭此次南巡所有江浙二省派出辦差兵丁著賞給兩月錢
糧以示恩賚欽此

十二日內閣奉

上諭朕巡幸江浙所有該二省辦差文武各官任內罰俸住俸
降級之案俱著加恩准其開復其無此等參罰案件者著各
加一級欽此

同日奉

旨梁同書梁敦書蔣惟枚各賞緞一疋欽此

十四日內閣奉

上諭江南浙江辦差滿洲兵丁著加恩賞給一月錢糧欽此

十五日內閣奉

上諭朕恭奉

皇太后臨幸江浙推

恩錫類優渥引年著將江寧京口杭州乍浦駐防男婦年七十以

上者亦照從前恩詔例一體賞給以敷慶澤欽此

閏二月初三日內閣奉

上諭朕巡幸江浙啟鑾之初降旨將江浙二省累年積欠銀糧

全數豁除而浙省所免之數較之江省尚少茲當入疆伊始
疇咨民瘼該省尙有未完款項著再加恩將浙江省乾隆二
十六七八等年積欠未完漕項及仁和袁浦等場未完竈課
銀一萬八千六百餘兩二十四五六七八等年因災緩帶積欠
未完南米及借給各場竈戶倉米一萬八千九百餘石二十
六八兩年錢塘諸暨玉環等廳縣借給農民緩徵穀及因災
緩徵租穀一萬六千九百餘石概行蠲免該督撫等其率屬
實力奉行務俾恩膏下逮稱朕惠愛黎元至意該部遵諭速
行欽此

初四日內閣奉

上諭朕翠華南幸始莅浙境念該省所免積欠較江省獨少且于未奉恩旨以前復有續完之項民情可謂急公因命悉查積年未完各項無論于例應蠲與否盡予豁除以紓民力至清蹕所經前已降旨蠲本年十分之三昨巡歷江省復念淮徐各屬地瘠民貧江淮以南人知愛戴凡水陸經行州縣以免十分之五浙江省雖郵頓無多而除道清塵亦足徵間閭歡感兩省皆係赤子誠求懷保厥視維均著再加恩將浙江經過地方本年應徵錢糧概免十分之五俾羣黎普沾膏澤益慶阜恬副朕入疆施惠至意該部卽遵諭行欽此

同日內閣奉

上諭朕稽古省方四蒞江浙已降旨將經過地方本年額賦豁免十分之三而省會駐蹕之地加恩更宜優渥其將江南之江寧蘇州浙江之杭州附郭諸縣本年應徵地丁銀兩概予豁免用宣慶惠該部遵諭速行欽此

初五日內閣奉

上諭三吳兩浙文風素盛昨于起鑾之先特降恩諭將江南分設各縣准于本年選拔時每學各取一人以廣教澤茲當翠華蒞止因念成均既多予拔尤而囊序亦宜增試額用循舊典以示渥恩其將江蘇安徽浙江三省本年應試文童府學及州縣大學增取五名中學增取四名小學增取三名各該

學政務慎加遴選詳悉校閱副朕樂育作人至意欽此

初六日內閣奉

上諭翰林院編修陳邦直著賞給翰林院侍讀銜欽此

初七日內閣奉

上諭朕時巡江浙清蹕所經恩膏疊沛軍民士庶無不忭舞臚
歡而清理庶獄亦矜恤所宜逮用循舊典以廣深仁著將江
蘇安徽浙江三省軍流以下人犯俱加恩各予減等發落俾
得改過自新勉爲良善共享太平之福欽此

初八日內閣奉

上諭此次接駕一百七歲之訓導王世芳著賞給扁額並綬二

疋欽此

同日內閣奉

上諭范燦李清芳著各賞綬三疋徐杞許王猷沈廷芳著各賞綬二疋章有大嚴源齋孫宗溥陳柟吳嗣富潘乙震沈榮仁章愷顧震孫效曾孔傅錦言如洙蔣宗海袁乾許世鏞屈樹榮張承詔翟均廉著各賞綬一疋欽此

大學士公

臣傅恒等謹

奏爲遵

旨賞賜浙江省合操大臣官員兵丁人等事查得上次賞賜浙江省操兵之大臣官員兵丁人等自將軍總督以下防禦以上

大臣官員及綠營大臣官員俱經分別賞給緞疋驍騎校
兵等每賞一月錢糧綠營千總把總外委把總兵等賞給
獎武銀牌浙閩舞牌馬上鎗之兵等俱經賞給獎武銀牌
其領操官員分別賞給緞疋金銀牌每人銀牌二面中二
鎗者加賞銀牌一面在案今次除將合操之浙江滿洲綠
營大臣官員兵丁人等及浙閩舞牌馬上鎗兵丁領操之
官員等俱照上次賞賜外請將鎗兵內中三鎗者二名每
人加賞銀牌二面中二鎗者四名每人加賞銀牌一面復
查十六年二十二年間浙江巡撫俱入于提督副都統等
次內賞賜于二十七年間奉

旨莊有恭著照將軍總督一體賞賜在案今次熊學鵬或照提
督副都統一體賞賜或照將軍總督一體賞賜之處伏候
諭旨指示敬謹遵行合將應賞大臣官員職名兵丁數目賞賜
綏疋錢糧金銀牌面數目另繕清單敬呈

御覽俟

命下之日請將賞給驍騎校兵丁銀兩交

行在戶部于兩淮鹽課內動支賞給所賞綏疋金銀牌面于
廣儲司支取賞給爲此謹

奏乾隆三十年閏二月初十日奉

旨熊學鵬著照將軍總督賞賜餘照所奏賞給欽此

十四日內閣奉

上諭浙江進獻詩賦考取一等之進士張培馮應樞舉人吳壽昌俱著授爲內閣中書遇缺卽補陸費墀著特賜舉人授爲內閣中書學習行走與考取候補人員挨次補用其二等之黃瀛元等十四名著各賞綬二疋欽此

十五日內閣奉

上諭沿途進獻詩賦人員除齊召南沈廷芳秦大士梁同書蔣和寧陸樹本吳以鎮李臺廖鴻章金士松程沆顧震孫效曾蔣宗海屈樹榮翟均廉孫梅李照王學淳張時憲高文照袁果李恆陶廷珍沈颺已經得賞其湯世昌睦朝棟吳簪汪存

寬阮學濬潘世仁汪又辰朱琰錢林吳光熙湯憲徐天柱潘
庭筠周世武倪承天應文虹著各賞綵一疋欽此

四十五年三月初三日

皇上南巡幸浙

閱視海塘

駐驛海寧安瀾園初六日

駕幸杭州

駐驛

行宮十五日

皇上回鑾

四十三年十一月十七日內閣奉

上諭據嚮導處奏乾隆四十五年春南巡所有自京至江浙杭州府沿途水陸路程繪圖進呈請旨辦理等因一摺從前四次南巡皆預派嚮導前往查勘原因山東江南尚有行營數處是以必須嚮導相度相定今春高晉國泰在京面請江南山東各添建行宮數處以供憩息俱已酌定地面并稱現在各行宮均有移拆材料足敷添用不致多費因允其所請飭令勿事浮靡是由京至江南登舟處陸程沿途俱有行宮毋庸武備院備帶大營城分及毡廬等項以省駝駝之煩并不必復派嚮導前往其沿途尖營向日本有章程只須酌量道

路長短安設遠者設尖營兩處若近在四十里以內者止設尖營一處均非難辦之事各督撫自能經理裕如著傳諭各督撫將南巡蹕路所經一應橋梁道路尖營行宮按站開明總列一摺并詳晰繪圖貼說呈進其兩省交界之處並須彼此照會將何處行宮及何道路係何省何州縣所轄明白聲敘自可一目了然又水程所安大營上四次南巡江浙兩省久經辦熟近年直隸山東間有於水營內備板房坐落數楹朕因回鑾時天氣漸熱且北方岸旁寬闊尙可擴充若江浙河岸窄狹實無可容板房之處且自登舟至回程不過春末夏初亦無取涼爽之處斷不可倣照山東直隸辦理至山東

水管舊料尙存原不妨聽之直隸并不必備水管也其餘各省古蹟行宮有由督撫承辦者有由鹽政織造承辦者均著一併開列清單繪圖貼說呈政總宜善體朕意勿稍踵事增華致耗物力將此傳諭知之欽此

十二月初一日內閣奉

上諭前經降旨允江浙所請于乾隆四十五年正月啓鑾南巡因江蘇辦理差務不無經費已有旨令伊齡阿於運庫內賞給銀三十萬兩以爲南巡差務之用矣第念浙江水管行宮等事雖少於江蘇地而然一切差務亦資費用自宜一體加恩著於鹽項餘銀內賞給十萬兩以爲浙江省辦差之用該督

撫務須董率所屬妥協經理毋得絲毫派累民間致滋紛擾
以副朕孚惠於民至意該部卽遵諭行欽此

四十四年十月初一日內閣奉

上諭朕明春巡幸江浙所有供宿頓次皆出自帑項絲毫不以
累民第扈從官兵以及外省接駕人等輻輳雲集經過地方
米糧價值恐一時或致騰躡著照從前之例於江浙二省冬
兌漕糧內各截畱十萬石在水陸駐驛地方分厰平糶卽令
漕運總督及各該督撫妥協辦理該部卽遵諭行欽此

十一月初三日內閣奉

上諭朕明春巡幸江浙於正月十二日啓鑾所有一切事宜著

各該衙門照例預備欽此

四十五年正月十九日內閣奉

上諭朕因東南黎庶望幸情殷爰舉舊章五巡江浙所以省方觀民勤求治理清蹕所經各處舊有行宮祇令掃除潔淨以供歇宿毋得踵事增華致滋糜費屢經降旨諄切曉諭封疆大臣自能仰體朕心遵旨辦理第念直省行館近京數程屢經駐驛卽掃墁裱飾爲費尙屬無多其自山東以至浙江所有行宮則自乙酉南巡至今未經臨蒞閑時既久不免耽舊剝落地方官修理葺治不無所費且山東江蘇二省俱有添建座落此項用費聞各省俱係捐廉辦理在地方大吏養廉

豐厚分年扣捐以抒忱悃尙屬可行况朕又復加恩賞給庫銀用示體恤伊等辦理儘足敷用若更因此派累閭閻致滋苛擾則斷不可且非朕念切民依行慶施惠之意也第恐不肖有司或有藉辦差爲名暗中科斂而窮鄉僻壤未及周知亦有帮貼差費者一經察出將該督撫等重治其罪以昭警戒其各凜遵朕旨慎勿自干嚴譴也將此通諭知之欽此

二月初六日內閣奉

上諭朕翠華南蒞愷澤覃敷而優卹高年恩施宜渥所有江南浙江二省老民老婦俱著加恩賞賚欽此

十四日奉

上諭江南浙江辦差滿洲兵丁著賞給一月錢糧欽此

十五日內閣奉

上諭朕巡幸江浙已降旨將經過地方本年額賦蠲免十分之三而省會駐驛之地加恩更宜優渥著將江南之江寧蘇州浙江之杭州所有附郭諸縣本年應徵地丁錢糧概予豁免俾近光黎庶無事輸將共享盈寧之福該部卽遵諭行欽此

三十日內閣奉

上諭朕展義言巡順時行慶浙江省輦路所經本年應徵地丁錢糧已先降旨蠲免十分之三茲入境伊始用宜更沛新恩俾資樂利所有該省歸安等縣緩征未完地丁漕白各款銀五

萬三千九百餘兩零並歸安等三縣緩征未完南米四千七
百餘石仁和等三縣未完民借穀一萬八千二百餘石均著
加恩一併豁免以紓民力該督撫等其董率各屬實力奉行
稱朕愛惠黎元至意該部遵諭速行欽此

三月初八日內閣奉

上諭浙江巡撫王亶望之母鄧氏年逾八秩著加恩賞給御書
扁額並大綬二疋貂皮四張欽此

初十日內閣奉

上諭呈出漪園玉件之商人姚經又據該撫奏稱爲浙商中最
得力之人著加恩從優賞給四品頂帶其辦事出力列爲一

二等各商內除何宗方已授遊擊封典汪立名金海業經議
叙州同卽用可母庸加恩外其捐職主事王仕基捐職同知
方燧捐職布政司經歷吳世驛許世斌捐職布政司理問許
擎捐職州同葉道立六員著加恩各照原捐職銜賞給加一
級頂帶欽此

同日內閣奉

上諭此次在淨慈寺接駕之紳士萬承式等十六員均年過古
稀龐眉皓首豐鑠可嘉著加恩賞綬二疋其老民內之魯文
元章廣奇俱壽屆期頤尤爲昇平人瑞魯文元著賞綬四疋
章廣奇著賞綬三疋鄭華玉亦年近九旬著賞綬二疋以示

優賚其王迪清等五名著各賞綬一疋欽此

同日內閣奉

上諭浙江進獻詩冊考取一等之馬履泰沈颺李彤沈叔埏著
特賜舉人授爲內閣中書學習行走與考取候補人員挨次
補用其二等之吳純等十三名俱著賞綬二疋欽此

四十九年三月十五日

皇上海巡幸浙

閱視海塘

駐驛安瀾園十八日

駕幸杭州

駐驛

行宮二十六日

皇上回鑾

四十七年十二月二十七日內閣奉

上諭浙江省上屆辦理南巡於杭州西湖等處添設座落點綴甚多繁費無益殊非朕省方問俗之意屢經降旨訓飭而此內葛嶺一處鑾山開道建蓋屋宇尤屬無謂且所費不貲朕心深所不取是以上屆卽未往臨幸此皆王亶望王燧借辦差爲名肆行糜費外博見長之巧陰遂貪縱之私其罪實由於此著傳諭福崧於葛嶺座落斷不必再加修整但係已成之

局竟任其自然可也將此諭令知之欽此

四十八年正月十五日內閣奉

上諭兩江總督薩載閩浙總督富勒渾等合詞陳奏以江浙兩省臣民望幸情殷且河工海塘以次告竣一切善後事宜尤冀親臨指示懇請於乾隆四十九年春六舉南巡盛典以愜輿情一摺朕自庚子南巡時巡閱高家堰石塘及徐州城外石堤鉅工俱逐一親臨指示茲據奏以次告成所有一切善後事宜自應臨蒞閱視指授機宜俾河流永慶安瀾至浙江省海塘前經降旨將柴塘四千二百餘丈一體改建魚鱗石塘爲濱海羣黎永資捍衛今要工將竣亦不可不親爲相度且

四十一年告功

闕里復閱時已久應行展謁

孔林以伸景仰今據該督撫等合詞陳奏江浙兩省耆庶望幸
惱忱尤爲肫切著照所請於乾隆四十九年正月諒吉啓鑾
祇謁

孔林巡幸江浙順道親閱河工海塘所有各處行宮座落俱就
舊有規模略加葺治母得踵事增華致滋煩費該督撫等其
善體朕意妥協辦理副朕省方問俗觀民孚惠至意摺并發
欽此

九月二十六日內閣奉

上諭朕明歲南巡一切行營供頓俱預期頒發帑金交該督撫備辦從無絲毫擾累閭閻但恐各督撫不能仰體朕意致滋糜費如現在盛京途次見有搭蓋買賣街席棚卽此一節亦屬多事隨營之官員人等其日用所需聽其自便木蘭每歲行圍何嘗官爲預備竝未缺少食物且添此席棚恐差過後不肖屬吏冒瀆開銷在所不免朕明春巡幸自直隸以至浙江著傳諭各該督撫不得隨營預備支搭買賣街棚厥以省無益之費至此次令阿哥等隨行者原令左右隨侍知朕年逾古稀未嘗稍懈而扈蹕諸大臣亦皆恪恭敬事管束嚴明令阿哥等觀看之意也該督撫等務須循照上數次之例辦

理差務行所無事總以節儉爲主不得因有阿哥隨行稍爲添設預備再各省鹽政織造關差皆係內府世僕知公主隨行係朕所鍾愛間進衣服食物以博朕歡殊不思服食玩好宮中何物蔑有豈藉外間進呈著一併傳諭飭禁伊等係內務府人員尙不許其稍有進獻至督撫爲封疆大吏又何得效尤及此耶將此傳諭知之欽此

十一月初四日內閣奉

上諭朕於明年正月十一日啓鑾巡幸江浙閩視河工海塘所有應行事宜各該衙門照例預備欽此

十三日內閣奉

上諭朕明春南巡著照從前之例於江浙二省各分漕糧內各
截畱十萬石在水陸駐驛地方分廠平糶卽令漕運總督及
各督撫妥協辦理該部遵諭速行欽此

十八日軍機處奉

諭旨閱圖內所擬添建座落原可不必該督等已經辦就只可
成事不說惟是該處原爲閱視水操而設其後層所蓋樓座
未免離江稍遠莫若將後一層樓座移置前面緊臨江邊於
閱視水操較爲近便欽此

二十一日內閣奉

上諭朕明春巡幸江浙扈從人等需用船隻俱照每船水手按

名給予催值第念該船戶等在途駕駛往返未免守候需時
若照常價每水手一名日給口食銀五分未能充裕著加恩
將所有扈從船隻按照水手每名日增給銀一分該督撫等
卽於恩賞銀內動支並責成司船之員稽查妥辦毋任胥役
人等從中侵蝕俾得均霑實惠欽此

四十九年正月初六日內閣奉

上諭朕今歲巡幸江浙原擇本月十一日啟鑾但節候在立春
以前天氣尙寒著諒吉於二十一日啟鑾欽此

二十五日內閣奉

上諭朕巡幸江浙上年業經降旨照從前之例於江浙兩省冬

兌漕糧內各截畱十萬石預備臨時平糶之用所有此次減
歇漕船向例止給一半月糧於該丁等生計未免拮据著加
恩於應給月糧外再賞給十分之二以示體恤該部卽遵諭
行欽此

二月十六日內閣奉

上諭朕因東南士庶籲幸情殷且河工海塘以次告竣一切善
後機宜均須親臨指示爰巡舊典六巡江浙茲當入疆伊始
慶典宜覃所有江南浙江水陸經過地方本年應徵地丁錢
糧俱著加恩蠲免十分之三該部卽遵諭行欽此

十七日內閣奉

上諭朕翠華南涖慶典覃施優惠者年宜加渥澤所有江南浙江二省老民老婦俱著加恩賞賚欽此

同日內閣奉

上諭朕清蹕時巡恩施宜溥所有江浙二省派出辦差兵丁著加恩賞給兩月錢糧欽此

同日內閣奉

上諭朕巡幸江浙所有該二省辦差文武各官任內罰俸住俸降級之案俱著加恩准其開復其無此等叅罰案件者各加

一級欽此

二十二日內閣奉

上諭朕清蹕巡方順時行慶而矜恤庶獄屢念尤深宜沛德音
用敷愷澤江蘇安徽浙江三省軍流以下人犯俱著加恩各
予減等發落用昭肆眚施惠之至意欽此

同日內閣奉

上諭江浙兩省文風素盛前翠華臨幸曾降旨增廣試額茲舉
六巡慶典允宜特沛恩施所有江蘇安徽浙江三省本年應
試文童府學及州縣大學著增取五名中學增取四名小學
增取三名各該學政務宜遴拔眞才副朕嘉惠膠庠樂育甄
陶之至意欽此

二月二十六日內閣奉

上諭此次南巡所有江寧京口杭州乍浦等處駐防之老人老婦加恩一體賞賚用宣慶澤欽此

同日內閣奉

上諭朕巡幸江浙已降旨將經過地方本年額賦蠲免十分之三而省會駐驛之地恩膏更宜優渥著將江南江寧蘇州浙江之杭州所有附郭諸縣本年應徵地丁錢糧概予豁免俾近光黎庶無事輸將益享盈寧之福該部卽遵諭行欽此

三月十二日內閣奉

上諭據福崧奏兩浙商人何永和等欣逢翠華幸浙惠洽東南又於范公塘改建魚鱗石塘永資保衛該商等情愿依照老

鹽倉改建鱗塘捐數共捐輸銀六十萬兩以効下忱等語兩
浙商人資藉官鹽營運獲息今因范公塘一律改建石工閣
閣得資保護永慶安瀾伊等桑梓情殷輸忱報効甚屬可嘉
自應俯從所請所有此項銀兩連前次發交公項一併歸入
海塘工程應用工竣照例核銷該商人等竝著加恩交部議
敘該部知道摺并發欽此

同日內閣奉

上諭朕翠華蒞浙愷澤覃敷前已降旨將經過地方本年額賦
蠲免十分之三竝省城駐驛之仁和錢塘二縣本年應徵地
丁錢糧概予豁免今入疆伊始周諮民隱再沛恩綸所有杭

州嘉興湖州三府屬本年應徵地丁錢糧共一百九萬餘兩
著再加恩普免十分之三俾近光黎庶益享盈寧以副朕省
方問俗施惠閭閻有加無已之至意欽此

二十一日內閣奉

上諭浙江福建進獻詩冊考取一等之張師誠費錫章何金姚
祖同著特賜舉人授爲內閣中書學習行走與考取候補人
員挨次補用浙江省考列二等之吳純張廷桂張彤王觀沈
樹錢枚朱光烈汪步瀛黃絲凌鍼朱孫垣應澧許翼宗楊本
翁樹沈珏翁濂陸以誠福建省列爲二等之鄭光策詹碧炎
王上泰著各賞綬二疋欽此

謹按杭州府

行宮在湧金門內太平坊舊爲織造公署康熙二十八年
聖祖仁皇帝南巡

駐驛于此自後屢蒙

巡幸卽奉爲

行宮

頭門 花牌樓 茶房 東西宮門 宮門內九間大殿

恭奉

聖祖仁皇帝龍牌康熙四十四年啓水門引水入城開河廣五尺

深入尺至三橋折而南又轉東恭備

聖駕南巡

御舟出入乾隆十六年

皇上法

祖勤民親奉

皇太后安輿巡幸浙江地方大吏敬謹重修恭備

駐蹕

頭宮門 二宮門 前殿 二殿 前寢宮 後寢宮

後照房

自前殿以後均
有迴廊廂房

後又一院恭奉

聖祖龍牌

頭宮門外

東西朝房各十間

東西牌樓二座榜曰就日瞻雲

正

中牌樓一座榜曰萬邦咸寧

旁有朝房

軍機房

東

西膳房

西湖

行宮在孤山最高處康熙四十四年四十六年

聖祖仁皇帝南巡兩經

駐蹕雍正五年

世宗憲皇帝俯順浙民愛戴思慕之誠卽其中虔供法王祝頌

聖德神功于萬世

御書聖因寺額崇建

萬歲樓恭奉

聖祖神御龍輶乾隆十六年春

皇上南巡浙省臣民歡迎恐後卽子

聖因寺西恭建

行宮規制淳樸恍見堯階舜陛棟牖松雲之象二十二年二
十七年三十年四十五年四十九年屢蒙

駐蹕

宮門 垂花門 奏事殿 睞宮 後照房

西所

宮門 垂花門 望湖樓 戲臺 看戲殿 捲棚 睞

宮 後照房 過西箭廳又西

阿哥所 一直五進又西爲花園

御題八景

四照亭

臨孤山對葛嶺山光塔影倒漾明湖舊有額曰雲峯四照因以名亭

竹涼處

叢篁深翳戛玉撻金塵氣爲之盡滌

綠雲逕

由竹涼處曲折西行喬柯奇石目不給賞雲氣時起步屢間

瞰碧樓

樓俯全湖晴波綺縠搖蕩几牖有一碧萬頃之槩

貯月泉

水月清光互相映發平湖旣已標勝山半一泓亦先得月豈以大小殊觀

鶯香庭

老桂森庭宛然臯塗精舍爰取鶯嶺天香句意顏之

領要閣

湖山幽邃不可勝窮略觀大意此領其要

玉蘭館

春巡至止值辛夷盛放卽景紀勝未知與輞川舊館何若

自綠雲逕而上爲

御碑亭 由領要閣而下顏曰

繡壁空青

頭宮門外

東西朝房各十間 正中牌樓一座榜曰日月光華 旁
官廳二座 軍機房 東西膳房

杭州府志首卷六